

Lustrata Definitione, nec non constituta Causæ Moralis Causalitate, recta absque ullis ambagibus progredimur ad species, aut veluti alii loqui amant ad modos ejusdem, perinde enim esse putamus sive vocitentur species sive modi, de hoc enim nulli litem movebimus. Ut verò quid certi habeamus, secundum quod harum specierum seriem enarrare possimus, lubet juxta ordinem istius distichi procedere, quod communiores & potissimos Causæ Moralis modos exhibet, quod in Weisii Compend. Metaph. ita se habet.

Jussio, Consilium, Consensus, Palpo, Recursus.

Participans, Mutus, non obstans, non manifestans.

In quibus versibus, licet non omnes, Communiores tamen fiuntur modi, ita ut nullus ibi contineatur, qui non causæ Moralis rationem habeat, vel cui non æstimatione prudentum effectus imputatio adscribi possit. i. Species Causæ Moralis est, **Directa Volitio**, seu velle directe, cum quis directe effectum vult, & propterea aliud agens ad illum producendum inducit, licet ipse reali influxu in eundem non influat. Dicitur autem notanter *directè velle*, quod quis explicite vult, ita ut non tantum fit volitum in causa, sed ut ex hac voluntate quoque habeat ortum ad distinctionem τῆ *indirectè velle*, cum quis exhibet causam, ex qua quidem effectus sequi potest, non tamen semper sequitur, & si accidit, implicitè ac indirectè voluisse dicitur. Illud autem *Directè velle* peragitur juxta Thomam in l. 2. q. 62. art. 7. multis modis. (α) mandando s. jubendo, sive expressis verbis sive signis tacitis, quibus ostendit sibi placere factum. Calculum suum nobis hac in parte adjiciunt Jure Consulti, apud quos pro homicida habetur, sive propria manu spoliationem & inde insecutum homicidium peregerit, sive astu insidiis & dolo malo occisori ansam ad interimendum præbuerit; nam ut Wesenbecius in paratitl. 1. ff. ad leg. Corn. de sicariis statuit, item Harprecht ad leg. Cornel. de sicar. n. 77. delictum mandantis & mandatarii unum & idem esse quoad effectum, qui inde sequitur, dicit enim expresse Wesenbec. l. cit. *Mandatum hic equipollet facto, nec diversa hæc sunt,*

G

sunt,